

# I MUGUGNI DI MARIA VIETZ A-O CONFUGO 2012

Arrivæ a-a meitæ de quest'annâ  
me son trovâ a riflette un po' sbandûa,  
in veitæ no saveivo cöse fâ  
pe remediâ a questa vitta dûa.

Pensavo: no sagriate, ti n'æ coæ  
lascia corrî o pescio, vagghe appreuvo.  
Invece l'è scciuppou a gran novitæ  
a Tursci s'è assettou o scindico neuvo.

Finamente! No moiemo ciù de noia,  
ghe saiâ do fermento, cangiamento.  
Figurase! Han eletto un Doia!  
E marciamo tutti con e veje a-o vento.

L'ho vosciuo ammiâ un po' da-a vixin  
sto neuvo duxe pe avei un paei çerto;  
me ghe so assettâ d'arente a-o careghin  
into salon donde gh'ea o conçerto

vosciuo da 'A Compagna' nostra associazion!  
Chitare, pathos, belle melodie,  
voxi, atmosfera e belle canzoin...  
ma poscitoëse... l'aise visto rie!

Solo 'na votta, solo un sorisetto.  
Foscia o l'aviâ un carattere un po' schivo  
ma pe un sorriso no ghe veu o biggetto  
e ciù pensavo, meno gh'acapivo.

M'han dïto poi ch'o gh'è tanto piaxuo,  
scia l'a complimentou i esecutoi,  
che scia s'è trattegnuo ciù do dovuo,  
ch'èan veramente bravi tutti dui.

Comunque in zunta carne ghe ne bugge:  
chî a veu cheutta, chî crua, chî a veu assazzâ  
o l'è un continuo remesciâ de ...ugge  
che veuan tutti quarcösa realizzâ.

In "primis" da gronda gh'è a question,  
in fila o caestioso terzo varco,  
de l'Amt a privatizzazion  
e riuscî a fâ o gran vendendo Quarto,

o ripristino a Brigate Partigiane,  
i vinti appartamenti sciù a Begæ,  
sucediâ che finiâ tutto a puttane  
co un gran sgaio de liti e de dinæ.

L'Amt a l'è 'na vègia spinn-a  
ch'a l'avvelena o sangue a tutta Zena  
ma co st'andasso ciù che andâ in rovinn-a  
o servizio o finiâ pe andâ in cancrena.

Senza parlâ de sciummi e de torrenti  
groschi o piccin o prinçipe Besagno  
che pe l'incuria de noiâtri utenti  
da-e due a-e træ o ne mette o cû a bagno!

Grann-e e disastri scia n'ha za sentio,  
e palanche han za piggiou o xeuo,  
oua se gh'è misso anche l'Amiu  
e chissà se o sacco o saiâ veuo.

Vorriæ parlâ d'extracomunitai  
ma no faia che azzunze legna a-o feugo  
o caregaghe o zembo d'âtri guai  
ma de parlane oua no l'è leugo.

Pöveo mæ Duxe comme noviziato  
dieiva che scia l'è cheito propio mâ.  
Speremmo che o padron do cian de d'âto  
o ghe concede a grazia de quetâ.

Vorriæ dîghe che scia l'è un bel'ometto  
co-a faccia fëa d'antiga scciata.  
Ma scia fasse ogni tanto un sorisetto...  
e scia no pense che son vegia e matta.

A mæ venn-a poetica a sbiadisce  
e de parlâ no n'ho propio ciù coæ;  
coscî o mæ mugugno chî o finisce.  
Chiedo venia: son a voxe da çittæ.

